


地/240.19

35

部五:7

(七)



餘杭縣志卷二十九

方外傳一

大滌雙徑為餘邑名山故自晉唐以來高僧高道棲遊於其間者代不乏人兩寺觀本各有志志所已詳間從節取並採碑傳詩文之見於羣書者錄之或可補兩志之缺其他各寺觀僧道有可傳者亦隨所採存之不稍遺亦不求備云

釋氏

晉

支遁字道林河內林慮人或曰陳留人本姓關氏少而任性獨往風期

餘杭縣志

卷二十九

方外一

釋

一

高亮家世奉法常於餘杭山沈思道行泠然獨暢年二十五始釋形入道東居會稽孫興公謂王逸少曰道林拔新領異胸懷所及乃自佳卿欲見否王一往儁氣見殊輕之會王將行遁曰君未可去當與君小語因論莊子逍遙遊數千言才藻新奇葩采映發王遂披襟解帶流連不能自已晉哀帝欽其風味遣中使至東迎之遂至京師王仲祖稱其造微之功不異王弼同學法虔儁朗有理義遁甚重之虔卒後遁精神實喪風味轉墜嘗謂人曰昔匠石廢斤於郢人牙生輟弦於鍾子推己外求良不虛也冥契既逝發言莫賞中心蘊結余其亡矣却後一年太和元年年五

十三終於剡之石城山因葬焉後王珣過墓下爲詩序曰  
余以寧康二年命駕之剡之石城山卽法師之邱也高墳  
鬱爲荒楚邱壠化爲宿莽遺跡未滅而其人已遠感想平  
昔觸物悽懷其爲時賢所惜如此

劉義慶世說新語參劉孝標注

曇翼餘杭人初入廬山依遠公後入關中見羅什東還會稽  
入秦望山誦法華經十二年有女子身被彩服攜筠籠籠  
一石豕蒜兩根至師前曰妾入山採薇日已斜豺狼縱橫  
歸無生理敢托一宿師却之力復哀鳴不已遂令居草牀  
上夜半號呼腹痛告師按摩師辭已持戒不應手觸女呼  
號愈甚師乃布裹錫杖遙爲按之翌日女以彩服化祥雲

餘杭縣志

卷二十九

方外一

釋

二

豕變白象蒜化蓮臺凌空而上謂師曰我普賢菩薩特來  
相試郡太守孟顛聞于朝廷敕建法華寺初餘杭山沙門  
法志常頌法華有雉巢于庵側翔集座隅若聽受狀如是  
七年雉殞卽爲瘞之夜夢童子拜曰因聽經得脫羽類今  
生山前王氏後其家設齋志方踵門兒曰我和尙來志撫  
之曰汝我雉兒也解衣視腋下有雉毳三莖七歲出家十  
六落髮以腋有毳因名以翼

蓮社高賢傳

南北朝

慧靜姓邵吳興餘杭人厲行精苦風姿秀整解兼內外偏善  
涅槃初住沿城寺顏延之何尚之並欽慕風德延之每歎

曰荆山之玉唯靜是焉及子竣出鎮東州攜與同行因栖於天柱山寺及大明中又遷居剡之法華臺後憩東仰山並以宏法爲務太始中卒年五十有八所著文翰集爲十

卷

高僧傳  
下同

淨度吳興餘杭人少好游獵嘗射孕鹿墮胎鹿母銜痛就地舐子度心悟因摧弓折矢出家蔬食誦經三十餘萬言嘗獨處山澤坐禪習誦若邑中有齋集輒身然九燈端然達曙以爲供養如此累年忽告弟子令辦香湯洗浴說法數千言而化

僧瑜姓周吳興餘杭人弱冠出家業素純粹元嘉十五年與

餘杭縣志

卷二十九

方外一

釋

三

同學曇溫慧光等於廬山南嶺共建精舍名曰招隱瑜常以爲結累三塗情形故也情將盡矣形亦宜捐藥王之轍獨何云遠於是屢發言誓始契燒身以宋孝建二年六月三日集薪爲龕并請僧設齋告衆辭別道俗知者奔赴彌山並稽首作禮願結因緣咸見紫氣騰空久之迺歇時年四十四其卒後旬有四日瑜房中生雙桐根枝豐茂巨細相似貫壤直聳遂成連理奇樹有識者以爲娑羅寶樹剋炳泥洹瑜庶幾之故見斯證因號爲雙桐沙門吳郡張辯爲平南長史親覩其事具爲傳讚

法開姓俞氏餘杭人稚年出家北倉寺爲曇貞弟子尋負笈

西遊從柔次二公學成實論衣不蔽形食纔支命歷業既優精解無礙或遇勅敵揖而不攻有時竊發潛登以掩不備當其鋒者罕不結舌由是顯名後還餘杭止於西寺講筵相接道俗嘆服沙門智藏後遊禹穴講化成論開往觀之鯁難累日賓僚粲悅藏曰開法師語論已多自可去矣吾欲入定開曰釋迦說法多寶涌現法師指南命終而遣客何耶藏有慚色以普通四年卒世壽六十有五舊縣志下同

全玘餘杭人入徑山禮法濟大師求剃染稟質強渥力耐飢寒諸所參求略得周徧晚於衡嶽中結茆以居木食澗飲紉軟草爲衣寒暑不易有以詩贈者云窠居更後有何人傳得如來法印真昨日祝融峯下見草衣便是雪山身別事詳南嶽傳中

唐

等觀富陽孫氏受止觀于智者居天台常誦法華貞觀九年冬餘杭法忍寺請師講演明年正旦有王服者至稱臯亭廟神來謁曰禪師昨過廟庭適弟子巡遊不及奉迎今故遠來轉求戒法師卽索爐燃香爲授菩薩大戒禮謝而退明日夜半沐浴更衣面西趺坐稱三聖尊號及智者各百餘聲復爲惠法師說止觀法門且云此吾親承大師口說言畢而終

重訂天台山方外志要

道一字法崙餘杭人族姓嚴氏龍泉寺律師

李華杭州餘杭縣龍泉寺故大律師碑云大朴既雕淳源不復生人溺於迷妄自拔無由我梵惟哀之力現靈東方雷起羣蟄間生龍象調御人天巍巍乎大明燭幽而品物知向矣噫稠林枝幹榮枯不息火宅烟焰起滅相尋於衆生速壞之身有諸佛常存之性垢衣纏寶而不見濁水求珠而未得法無高下根有淺深由是起禪那證入之門立毗尼攝護之藏土因水而成器火得薪而待燃惟此二宗更相為用律用嚴奉則淨無瑕缺戒光深照則測見本源次修定門而自調伏云何為大定地雖傾而不動云何為修我心雖寂而無住然後登般若之岸上楞伽之峯以此身為法身了無得為真得或有默修元契於文義受教頓悟於宗師不由門階徑造堂室微塵學者時得一人復有大悲空隘而不窮宏誓海涸而不盡俯從像法以導世間則我大律師其人也師諱道一字法崙餘杭嚴氏生族姓之家是為因地作如來之子寧有本緣故祖考不書尊上乘也體峻山岳神閑江海機對敏洽應受融明自襜襟至於成童顏色無違視聽皆正年甫八歲辭親就師鴻鵠入冥自然方外蓮花出水不染泥間十七預剃度隸龍泉寺

受具於光州岸律師行相珠圓滌流鏡澈始就山陰聽岸講涅槃經師既歸而為衆敷闡同時聽者幸以為師恭惟此經佛最後說教旨深圓故草元著義法華經大事因緣授聲聞記口誦心奉誓盡當來金剛經滅度無邊悉離諸相誦起信論滌除邪妄開導心宗常所受持皆為義釋於華嚴入普賢性海於維摩得不二法門凡歷見聞莫非心證從文悟理也白日頓明於世界飛鳥自在於空中從理乘如也常謂天台觀門往誓深教吾所歸也夫垢因戒淨惠定以生未有愛尚存而坐登三昧每歎曰持心繫於刹那求道本於清淨使學徒懈怠由軌範不明教之興衰在我而已矣乃設一席口心必隨嘗講大乘方攝齊登座侍者布席微爽律文即命撤席解衣以俟明日其檢身激下皆此類也自是江南律學砥礪彌精矣至若齋場星列談座雲繞四衆仰山王之高萬里赴龍宮之會遠夷逾海而來聽長老順風而請益至仁生滅至辨成簡判析疑問若陽和解冰宏敷妙理如止水觀月化童蒙為上智伏慢為調柔引諸佛戒定之池浴衆生輕重之垢若自流去池常湛然又以儒墨者般若之笙簧詞賦者伽陀之鼓吹故博通外學時復著文在法中無佛事故李大理昇期崖河南希逸嘗撫本州麾幢往復故成御史廣業今盧華

州元裕兵部韓員外賞屈身郡邑輪舸洄沿及鄉人故汴  
州何司戶寒同與扣絕韻於清風味元機於永夕盧山師  
友今古一時誠願密宏常修本寺尊容縷網高殿棟宇工  
人殫其百榼信士竭其千金佛宮嚴麗一方勝絕寫大藏  
經手自刊校學者賴焉廣常住田通給無闕凡聖均焉於  
天竺寺造慈氏變相憑高爲臺與衆均福光靈矜蠶如在  
會中永以報生育劬勞之恩光先師訓誘之德不離宴坐  
應者如歸天寶十三年春忽洒飾道場端理經論惟銅瓶  
錫杖留置左右具見五天大德十八羅漢幡蓋迎引請與  
俱西二月八日恬然化滅報齡七十六僧臘五十七生以  
其日滅亦如之昔同如來捨位之辰今是菩薩往生之日  
古先大士無此明徵先時院庭有百合兩本對發白花光  
如月輪照於昏夜嗚呼慈雲旣歸花亦彫萎物感如是人  
哀可知至某月日遷厝於寺之西偏江嶺淮湖縵衣縞素  
茶毗之會聲動山川寂寥原野人亡地古悲夫一爲人師  
六十年矣遠名利故不游京國樂閒安故不出戶庭有請  
方去故深慈密行莫得而究焉門人之冠者一行禪師惠  
罕法師津梁寺乾應律師蘇州東林寺懷哲律師湖州開  
元寺惠燈少明之記長者寶藏脩身執持導師化城無處  
瞻仰眷屬之賢有若族人神郁等如來影中怖畏都盡力  
色假言喻空  
觀我爲則

元素字道清延陵馬氏子號徑山大師

李華潤州鶴林寺故徑山大師碑銘曰道行無迹妙極無  
象謂體性空而本源清淨謂諸見滅而覺照圓明我天人  
師示第一義師無可說之法義爲不二之門其定也風輪  
駐機其慧也日宮開照其用也春泉利物三者備體誰後  
誰先入無量而不動開法華而涌出湛兮以有無觀聽而  
莫測寥兮以遠近思惟而不窮知德皆空爲真實際大悲  
恆寂遍撫羣迷月入百川之中佛匝千花之上修而登者  
元同妙有應而起者旁作化身先大師適來此土化身歟  
適去他方補處歟不可得而知也自如來現滅四魔橫恣  
人天無怙寄命崩崖勝大敵者那羅延身銷大毒者伽陀

妙藥拔陷扶墜而生大師延陵馬氏諱元素字道清崇高  
紹興於法位胄緒不繫於人間慈母方娠厭患葷肉長至  
之日誕彌仁尊生有異祥乳育安靜既亂稽首父母求歸  
法門即日獲請出依精舍如意年中剃度隸江寧長壽寺  
既進具已戒光延照定水澄源鵝王之不受泥塵香象之  
頓除羈鎖未之比也身長七尺體無凡骨眉毫際臉口若  
方舟目不顧睇聲侔扣玉入南牛頭山事威大師撞鐘大  
鳴入海同味迦葉以頭陀第一大師亦斗藪塵勞聞一知  
十未嘗請益觀法無本觀心不生喻金剛之最堅比師子  
之無畏圓月照海高深盡明慧風吹雲宇宙皆淨威大師  
摩頂謂曰東南正法待汝興行命於別位開導來學於是  
騶虞馴擾表仁之□也衆禽獻果明化之均也接足右繞  
百千人俱大師悉以菩薩呼之教習大乘戒妄調伏自性  
還源無漸而可隨無頓而可大摩尼照物一切如之吾常  
□然無法可說或有信願雙極懇求心要於我渴仰施汝  
醍醐問禪定耶吾無修問智慧耶吾無得道惟心證不在  
言通懷帝釋輪終爲世論自淨而已無來色聲既悟者小  
無微塵大無三界當悟者內珠雖隱猶作來因藥草萬殊  
根莖等潤貌和言寡飢至飽歸或有聞尊稱而遷善見色  
身而獨得我無示念道溥慈圓食不問鹹酸口不言寒暑

身同地水飽蚊蚋之飢渴道離人我順衆生之往來貴賤  
□親是法平等故饋甘味而不辭同於糗糲奉上服而不  
拒齊於弊褐俾夫家有道侶府無爭人開元中本寺僧汪  
密請至京口潤州刺史韋銑灑掃鶴林斯焉供養有屠者  
恣刃積骸如山聞大師尊名來仰真範忽自感悟讎伏求  
哀大師受之又白曰和尚大悲當應我供大師衲衣跣趺  
未嘗出戶公侯稽首不爲動搖至是如其懇求忻然降詣  
夫盜隱其罪虎慈其子仁與不仁皆同佛性無生無滅無  
去無來今濁流一澄清水立現諸佛所度我亦度之天寶  
中揚州僧希元密請至廣陵便風馳帆白光引棹楚人相  
慶佛日渡江梁宋齊魯傾都來會津塞途盈人無立位解  
衣投施積若邱陵皆委於所在行無住捨禮部尚書李澄  
時爲揚州牧齋心跪謁爲衆唱首望慈月者誰不清涼傳  
百億明燈照四維上下塵沙之數皆趨佛乘二州以貪法  
之心移牒逾月均吾喜捨成爾堅牢無非道場還至本處  
天寶十一載十一月十一日中夜坐滅嗚呼菩提位中六  
十一夏父母之生八十五年赴衰位者可思量不至有浮  
江而奠望寺而哭十里花雨四天香雲幢幡蓋網光蔽日  
月以其月二十一日四衆等號捧金身建塔於黃鶴山西  
原像法也州伯邑宰執喪師之禮率衆申哀江湖震悼曩



於寺內移居高松互偃涅槃之夕椅桐雙枯虎狼哀號聲  
破山谷人祇慄慄天地晦暝及發引登原風雨如掃慈烏  
覆囀靈鶴徊翔而有情無情德至皆感初達摩祖師傳法  
三世至信大師信門人達者曰融大師居牛頭山得自然  
智信大師就而證之且曰七佛教戒諸三昧門語有差別  
義無差別羣生根器各各不同唯最上乘攝而歸一涼風  
既至百實皆成汝能總持吾亦隨喜由是無上覺路分爲  
此宗融大師講法則金蓮冬敷頓錫而靈泉滿溢東夷西  
域得神足者赴會聽焉融授巖大師授方大師授持  
六師持授威大師凡七世矣真乘妙緣靈祥嘉應歟具傳  
錄布於人世門人法鏡吳中上首是也門人法欽徑山長  
老是也觀音普門文殊佛性惟二菩薩重光道源門人法  
勵法海親奉微言感延霜露繕崇龕座開構軒楹時惟海  
公永報師訓廬孔氏之墓起淨明之塔世異人同法然長  
慕僧慧端等蔭旃檀樹皆得身香菩薩戒弟子故吏部侍  
郎齊澣故刑部尚書張均故江東採訪使潤州刺史劉曰  
正故廣州都督梁昇卿故採訪使潤州刺史徐嶠故採訪  
使常州刺史劉同昇故潤州刺史韋昭禮故給事中韓賞  
故御史中丞李丹故涇陽縣令葛齊融禮部員外郎崔令  
欽道流人望莫盛於此弟子嘗聞道於徑山猶樂正子志

餘杭縣志 卷二十九 方外一 釋

之於夫子也洗心瞻仰天漢彌高鏡公門人悟甚深者大  
理評事楊詣過去聖賢諸功德藏志之所至無不聞知魯  
史從告况乎傳信其文曰濁金清鏡在爾銷鍊磨之瑩之  
功至乃現膏漬炷然光明外遍陽升律應草木皆變啓迪  
瘖瞽惟吾大師息言成教捨法興悲辰極不動風波自移  
境因心寂道與人隨杳然元默湛入無餘性本無垢云何  
淨除身心晏寂太極淪胥內光無盡萬境同如甘露正味  
琉璃妙器遍施大千無同無異度未度者化周緣備  
忽枯涅槃時至我無生滅隨世因緣吉祥殿上應  
化諸天寂寂露塔滔滔逝川恆沙劫壞智月常圓  
按已上並從文苑英華錄出此篇文內絕不言元素嘗  
住徑山然其號爲徑山大師必非無因且又爲欽公之  
師因錄於此

道欽吳郡崑山人姓朱氏世服儒業年二十八貢于禮部道  
由丹徒遇鶴林元素禪師得指入道之要遂出家大悟宗  
旨久之辭去素曰汝乘流而行遇徑卽止師至臨安東北

山下問途于樵者曰此徑山也師至東北而登陟崇岡西至高峯北巖中據石牀而坐俄有老人素衣拜于前曰我龍也自師至此吾屬五百皆不安居當挈歸天目願以此地爲立錫之所言訖不見北峯之陽有草庵可居蓋龍所造也西湖高僧事略大歷中代宗遺內侍黃鳳持詔致師詣闕庭咨以法要謂忠國師曰欲賜欽師一名忠欣然奉詔乃賜號國一焉已而力辭南還舊山勅本州于徑山重建精舍度僧七人年九十二圓寂德宗賜諡號曰貞元大覺禪師塔曰天中天復中許思兵亂發塔見二缸合藏肉身如生髮長覆面士卒悚拜而去吳越王厚禮重葬於舊塔焉舊縣

餘杭縣志

卷二十九

方外一

釋

九

志

李吉甫杭州徑山寺大覺禪師碑銘并序曰如來自滅度之後以心印相付囑凡二十八祖至菩提達摩紹興大教指授後學後之學者始以南北爲二宗又自達摩三世傳法於信禪師信傳牛頭融禪師融傳鶴林馬素禪師素傳於徑山山傳國一大師二宗之外又別門也於戲法不外來本同一性唯佛與佛轉相證知其傳也無文字語言以爲說其入也無門塔徑術以爲漸悟如夢覺得本自心誰其語之國一大師其人矣大師諱法欽俗姓朱氏吳都崑山人也身長六尺色像第一脩眸蓮敷方口如舟疑焉若峻山清孤泊焉若大海風上故揖道者之器者識天人之師焉春秋二十有八將就賓貢途經丹陽雅聞鶴林馬素之名往申款謁還得超然自詣如來密印一念盡傳王子妙力他人莫識卽日剃落是真出家因問以所從素公曰逢徑則止隨汝心也他日遊方餘杭西山問於樵人曰此天目山之上徑大師感鶴林逢徑之言知雪山成道之所於是蔭松藉草不立茅茨無非道場於此宴坐之久邦人有構室者大師亦因而安處心不住於三界名自聞於十方華陰學徒來者成市矣天寶二祀受具戒於龍泉法崙

和尚雖不現身意亦不捨外儀於我性中無非自在大歷初代宗睿武皇帝高其名而徵之授以肩輿迎於內殿既而幡幢設以龍泉圍繞萬乘有順風之請非民渴灑露之仁問我所行終無少法尋制於章敬寺安置自王公逮于士庶其詣者日有千人司徒楊公綰情游道樞行出人表大師一見於衆二三目之過此默然吾無示說揚公亦退而歎曰此方外高士也固當順之不宜羈致尋求歸山詔允其請因賜策曰國一大師仍以所居爲徑山寺焉初大師宴居山林人罕接禮及召赴京邑途經郡國警若優曇一現師子聲聞晞光赴響者輒擊肩摩投衣布金者邱累陵聚大師隨而檀施皆散之建中初自徑山徙居於龍興寺餘杭者爲吳東藩濱越西境馳軒輅者數道通賓驛者萬里故中朝銜命之士於是往復外國占風之侶盡此奔走不踐門閥恥如瘖聾而大師意絕將迎禮無差別我心既等法亦同如貞元八年歲在壬申十二月二十八夜無疾順化報齡七十九僧臘五十先是一日誠門人令設六齋其徒有未悟者以日暮恐不克集事大師曰若過明日則無所及既而善緣普會珍供豐盈大師意若辭訣體無患苦逮中宵跣趺示滅本郡太守王公顏卽時表聞上爲獻款以大師元慈默照負荷衆生賜謚曰大覺禪師海內

餘杭縣志

卷二十九

方外一

釋

十一

伏膺於道者靡不承問叩心徹惘號慕明年二月八日奉全身于院庭之內遵遺命也建塔安神申門人之志也嗚呼爲人尊師凡將五紀居唯一床衣止一衲冬無纊夏不絺綌遠近檀施或一日累千金悉命歸於常住爲十方之奉未嘗受施亦不施人雖外物去來而我心常寂自家教之興數百年矣人之信道者方怖畏於罪垢愛見於莊嚴其餘小慧則以生滅爲心垢淨爲別捨道由徑傷肌自瘡至人應化鑿其病故大師貞立迷妄除其意冥破一切相歸無餘道乳毒旣去正味常存衆生妄除法亦如故嘗有設問於大師曰今傳舍有二使郵吏爲割一羊二使旣聞一人救一人不救罪福異之乎大師曰救者慈悲不救者解脫惟大師性和言簡罕所論說問者百千對無一二時證了義心依善根未度者道豈遠人應度者吾無雜味日行空界書破昏癡珠現鏡中自然明了或居多靈異或事符先覺至苦飲毒不害遇疾不鑿元鶴代闍植柳爲蓋者此昭昭於視聽者不可備紀於我法門皆爲妄見今不書尊上乘也弟子實相門人上首傳授祕藏導揚真宗甚乎有若似夫子之言庚桑得老聃之道以吉甫連蹇當代歸依釋流俾筌難名強著無跡其詞曰水無動性風止動滅鏡非塵體塵去鏡澈衆生自性本同諸佛求法妄纏坐

禪心沒如來滅後誰證無生大士密受真源湛明道離言  
說法潤根莖師心是法無法修行我體本空空非實性既  
除我相亦遺空病譬如乳毒毒去味正大士得之斯為究  
竟何有涅槃適去他方教無生滅道有行藏不見舟筏空  
流大江蒼蒼遙山成道之所至人應化萬物皆  
觀報盡形滅人亡地古刻頌豐碑永存礪戶

按此文從文苑英華錄出府志引寶刻叢編載此碑不  
詳立碑所在據碑文則塔與碑皆當在杭城龍興寺  
張祐題徑山大覺禪師影堂詩超然彼岸人一徑謝微塵  
見相卽非相觀身豈是身空門性未滅舊里化猶新謾指  
堂中影誰  
言影似真

俱胝昌化人姓章氏童真修行永泰中忽于舍前溪南壟上  
騰空而去憩於潛廣覺寺後至徑山禮國一禪師道欽欽  
曰神告我長安佛法有難盍往救之因指座後石屏令叱  
之屏裂爲三欽親爲落髮授衣以往至長安與術士角法

餘杭縣志

卷二十九

方外一

釋

十二

勝之代宗賜紫方袍辭未具戒帝命開壇納戒方羯摩間  
乃隱身壇上莫知所之時以爲觀音應現賜號性空大禪  
師大歷二年來歸捨宅爲寺後人名其始乘雲處爲起雲  
墩於潛所憩處爲落雲寺所叱石爲喝石巖

萬歷縣志

按蘇詩注引徑山山門事狀載天目中子山人事語與  
此小異詳見山水門喝石巖條下又按湘山志載湘山  
寺之開山祖師卽俱胝也而所載姓名與餘志不同稱  
師俗姓周諱全真號宗慧大唐荆湖南郴州資興縣人  
敕封慧佑寂照妙應普惠大法師其志內全傳敘至徑  
山皈依國一及入長安門法事俱詳載獨不載喝石事  
亦非昌化章姓且載道士角法賜紫賜號俱在天  
寶戊子尤爲不合恐餘志所載非確附識備攷

全宰姓沈氏錢塘人投徑山法濟大師削染及修禪觀得石  
霜禪師印證入天台山闍巖二十餘年惡鳥革音山精讓

窟其出入經行鬼神執役高僧傳天成五年徑山禪侶迎歸

終于鎮國院天台山方外志要

鑒宗湖州長興錢氏子少而穎異風骨不凡於本州開化寺出家年二十七受具戒咸通三年至天目東登徑山遂駐錫焉弟子洪諲以經綸自負師告之曰佛祖正法直截亡銓汝算海沙於理何益但能莫存知見泯絕外緣離一切心即汝真性諲悟即呈偈曰這箇非他物元來不昧機達而全體現應處不思議咸通七年集眾說法端坐而化葬于寺之西大寂巖乾化五年吳越武肅王請于朝賜諡無

上禪師舊縣志下同

餘杭縣志卷二十九方外一釋

洪諲吳興烏程人姓朱氏生而神異十九依無上禪師削髮二十二往嵩嶽受具初習律乘未十日而誦畢棄之咸通七年上徑山適遭黃巢之亂巢之偏師領卒千餘見師師宴坐不起帥以劍揮禪牀者再師神色不動帥異之而去吳越武肅王徵時師一日謂其徒曰翼日有異人至當厚禮以待之詰朝王至師乃門迎延于方丈特異于他堂眾皆訝之乃密謂武肅曰他日獨霸吳越當須護持佛法無忘此言武肅謝而去及收杭州執弟子禮以事師待遇勤厚中和二年表乞賜師紫方袍景福二年武肅封吳越王復表乞賜號法濟大師諡為建初興國大師及親號塔曰

廣濟之塔徑山山門事狀參舊縣志

五代

文喜語兒溪人姓朱氏開成年間進具初習四分律兼講法華經嘗往五臺山禮文殊大士夜投古寺遇老僧問南方佛法住持衆數師皆答已却問此間佛法如何住持僧曰凡聖同居又問多少僧衆僧曰前三三後三三師惘然茶畢令童子送出門俄失所在但高山深谷而已後咸通三年參仰山契悟命爲典座一日見文殊跨獅子緣鼎側師訶曰文殊自文殊文喜自文喜遂掌之文殊湧空曰苦瓠連根苦甜瓜徹底甜修行三大劫却被老僧嫌咸通中築

餘杭縣志

卷二十九

方外一

釋

十三

室千頃山居之光啓三年錢武肅王請住餘杭慈光院賜紫衣及無著號光化三年移住無著院指月錄江南國主李昇迎住報恩禪院署號淨慧禪師益朝夕演唱諸方被化周顯德五年示寂于金陵李煜作碑頌韓熙載撰塔銘

國朝雍正十二年

敕封妙光法眼智藏禪師理安寺志

文益餘杭人姓魯氏從希覺師游旁探儒奧目爲孔門游夏嘗參琛和尚自是開悟周顯德五年終謚大法眼禪師塔

曰無相舊縣志

僧文益住金陵清涼寺世稱法眼宗嘗觀木平和尙有詩

云木平山裏人貌古年復少相看陌路同論心秋月皎懷

衲線非蠶助歌聲有鳥城闕今日來一謳曾已曉全唐詩

僧齊己寄益上人詩長想尋君道路遙亂山霜後火新燒近聞移住隣衡岳幾度題詩上石橋古木蟬聲連峭壁一燈雲影過中宵風騷味薄誰相愛欹枕常多夢鮑昭

志逢餘杭人幼歲出家臨安之東山朗瞻院嘗夢升須彌山

視三佛列坐初釋迦次彌勒皆禮其足惟不識第三尊釋

迦謂云此是補彌勒處師子月佛師方作禮覺後因閱三

藏經乃符所夢五燈會元天福中抵天台雲居參韶國師賓主

緣契頓發元秘一日入普賢殿宴坐有神人跪膝于前曰

護戒神也師曰吾有宿愆乎曰惟一小過耳凡洗鉢水亦

餘杭縣志 卷二十九 方外一 釋 古

施主物傾棄非所宜也言訖而隱自是洗鉢水盡飲之西湖

高僧事略忠懿王建普門精舍請揚宗要為開山始祖後五雲

山新勅華嚴道場施以終老即理安也師出入常攜大扇

號大扇和尚入市乞錢買肉飼虎虎每迎之載以還山又

稱伏虎禪師理安寺志吳越王號為普覺大師雍熙二年入滅

舊縣志

靈一姓吳氏廣陵人居餘杭宜豐寺禪誦之暇輒賦詩歌與

朱放張繼皇甫曾諸人為塵外友詩一卷全唐詩小傳

僧貫休哭靈一上人詩一公何不在空有遠公名共說岑山路今時不可行舊房松更老新塔草初生經論傳緇侶文章遍墨卿禪林枝幹折法字棟梁傾誰復修僧史應知傳已成

宋

延紹餘杭劉氏子從開元寺智恭剃髮受具修止觀定慧宿師爭下之游名山謁鏡清機話不契見南院俯就弟子之列從容承稟日聞智證後唐長興二年至汝水見草屋數椽田父曰古風穴寺乃留止日乞村落夜然松脂單丁者七年州牧聞風禮致之上元日開法嗣南院有宋太師施第為寶坊號新寺迎居焉法席冠天下周廣順元年賜寺名廣惠宋開寶六年八月旦登座說偈至十五日跏趺而

逝佛祖通載

延壽餘杭王氏子謁天台韶國師一見深器之曰汝與元帥

餘杭縣志

卷二十九

方外一

釋

十五

有緣他日大興佛事習定天柱峯下有赤鷄巢衣禪中後於國清行法華懺忠懿王時居永明寺十五載弟子千七百餘人開寶七年入天台山度戒約萬餘人開寶八年示寂塔于大慈山師著宗鏡錄一百卷雍正十一年

敕加封妙圓正修智覺禪師淨慈寺志

按咸淳臨安志延壽號抱一子日課一百八事未嘗暫廢崇寧中追謚宗照晃公武曰法眼嫡孫

慶祥餘杭人姓沈氏身長七尺餘辯才冠衆多聞強記天台門下推為傑出住杭州九曲觀音院隨機說法僧問險惡道中以何為津梁祥曰此為津梁曰如何是此祥曰捉著

汝鼻孔舊縣志



贊寧德清高氏子出家杭州龍興寺吳越武肅王署爲西浙僧統賜號明義宋太宗召對滋福殿勅修高僧傳咸平初加右街僧錄又著內典集外學集至道二年示寂諡曰圓

明大師 宋詩紀事

按瀛奎律髓載其居天柱山詩云四野豁家庭柴門夜不扃水邊成半偈月下殘經雖逐諸塵轉終歸一念醒未知斯智者菜役盡勞形此詩題稱居天柱山不知卽餘杭之天柱山否附此以備攷

斷橋天台黃巖徐氏子十八落髮于永嘉廣慈院謁無準于雪竇準移育王及徑山皆從俾分座出世祇園遷瑞巖國清淨慈將終索筆作詩辭諸山及魏國公公饋藥不受又使人問曰師生天台因甚死淨慈師答曰日出東方夜落

餘杭縣志

卷二十九

方外一釋

六

西遂書偈而化 武林梵志

澄慧大師徑山僧

蘇軾寄澄慧大師詩我昔曾爲徑山客至今詩筆餘山色師住此山三十年妙語應須得山骨谿城六月水雲蒸飛蚊猛捷如花鷹羨師方丈冰雪冷蘭膏不動長明燈山中故人知我至爭來問訊今何似爲言百事不如人兩眼尚能看細字

按此詩今石刻在寺中本集題曰送淵然師歸徑山與此題異或淵然是澄慧之號也

維琳號無畏大士俗姓沈武康人約之後也好學能詩熙寧

五年蘇軾通判杭州招住徑山後居邑之銅山作庵名無

畏 萬歷府志琳住銅山院有松合抱郡將治屋索材將往伐之

琳題詩其上云大夫去作棟梁材無復清陰護綠苔只恐

夜深明月下誤他千里鶴飛來縣尉至讀其詩乃止政和元年朝廷崇右道教詔改僧為德士皆頂冠琳獨不受命縣遣尉諭之琳即集其徒跌坐說偈而逝遺言以二缶覆其軀瘞山後東坡稱維琳行峻而通文麗而清宋詩紀事建中靖國初東坡自僂耳還至毘陵以疾告老琳往問疾有詩

贈答

舊縣志

蘇軾與徑山無畏惟琳禪師書臥病五十日日以增劇已頽然待盡矣兩日始微有生意亦未可必也適睡覺忽見刺字驚嘆久之暑毒如此豈昔年者出山旅次時耶不審比來眠食何如某扶行不過數武亦不能久坐老師能相對臥譚少頃即告晚涼更一訪

餘杭縣志

卷二十九

方外一

釋

七

當於徑山門選用有德乃以琳嗣事衆初有不悅其人然終不能勝悅者之多且公也今則大定矣

按東坡先生年譜注引紀年錄云七月疾頗革徑山老惟琳來說偈答曰與君皆丙子各已三萬日一日一千偈電往那能詰大患緣有身無身則無疾平生笑摩什神咒真浪出琳問神咒事索筆書昔鳩摩羅什病亟出西域神咒三番令弟子誦以免難不及事而終併出一帖云某嶺海萬里不死而歸宿田里有不起之憂非命也耶蓋絕筆於此後二日殆將屬續而聞觀先離琳叩耳大聲雲端明宜勿忘西方公云西方不無但個裏著力不得錢世雄云固先生平時履踐至此更須著力曰著力即差語絕而逝又按霏雪錄云徑山長老無畏居士維琳湖之武康人在常州以詩問東坡疾云扁舟駕蘭陵自援舊風日君家有天人雄雄維摩詰我口吞文殊千里來問疾若以默相酬露柱皆笑出

惠勤餘杭人嘗從歐陽修游三十餘年修稱其為人聰明才

智有學問者尤長于詩蘇軾有送錢塘勤上人詩序

續文獻通

考

惟政住餘杭山靜修時蔣侍郎堂守錢塘與師爲方外友師每來謁之則跨一黃牛以軍持掛角上市人爭觀之師自若也至郡庭下牛笑語終日而去一日蔣因會客款師請話師許之蔣喜甚明日要之則留一偈而去矣曰昨日曾將今日期出門倚杖又思維爲僧只合歸農谷國士筵中甚不宜坐客皆仰其高韻又作山井偈曰橋上山萬重橋下水千里惟有白鷺鷥見我常來此冬不擁爐以荻花作毬納足其中客至共之清論無窮秀氣逼人秋夏好玩月盤膝入盆中浮于水上自旋其盆吟笑達旦補續高僧傳有緣

餘杭縣志

卷二十九

方外一

釋

六

溪集

宋詩紀事

智策號塗毒初謁寂室光灑然有省次謁大圓於明之萬壽圓問曰甚處來師曰天台來曰見智者大師麼師曰卽今亦不少曰因甚在汝脚跟下師曰當面蹉過圓曰上人不然而秀不扶而直一日辭去圓送之門拊師背曰寶所在近此城非實師領之往豫章謁典牛道由雲居風雪塞路坐閱四十二日午初版聲鏗然豁爾大悟及造門典牛獨指師曰甚處見神見鬼來師曰雲居聞版聲來牛曰是甚麼師曰打破虛空全無柄靶牛曰向上事未盡在師曰東家暗坐西家厮罵牛曰蘄然超出佛祖他日起家一麟足矣

將示寂升座別衆囑門人以文祭之師危坐傾聽至尙饗  
爲之一笑越兩日沐浴更衣集衆說偈曰四大旣分飛煙  
雲任意歸秋天霜夜月萬里轉光輝俄頃泊然而逝指月錄

按劉攻媿集有塗毒禪師塔銘有門人曰宗惠亦見誌中

宗杲

字曇晦

宣城奚氏子十九遊方徧歷諸方圓悟住天寧師

往依之經半載一日問和尚在五祖時話舉有句無句如  
藤倚樹紹興七年詔住徑山孝宗爲普安郡王時聞師名  
嘗遣內都監至徑山謁師師作偈以獻及在建邸復遣內  
知客請師山中爲衆說法親書妙喜庵大字及製真讚寄  
師又二年而卽位賜號大慧禪師隆興元年八月十日示

餘杭縣志

卷二十九

方外一

釋

九

寂于明月堂賜諡普覺塔曰寶光

張浚普覺禪師塔銘

杲與張子韶

爲友觸秦檜怒流衡州後放還示寂孝宗賜號大慧禪師

宋詩紀事

元照錢塘人

宋詩紀事字湛然號安忍子餘杭唐氏子

自幼出家博究羣宗初居

天台移杭之東藏學徒爭從之復徙新城又愛餘姚之姜  
山因駐錫焉法行益高凡禱雨必應藥疫多效所撰有寶  
持記濟緣記行宗記應法記住法記報恩記及刪定尼戒  
本金剛疏之類西湖高僧事略有十尤工楷隸吟詩得風  
騷體一日聞笙簫聲遂歸寂焉明一統志元豐中賜諡大智律

師宋詩紀事

按宋高僧詩選載其白雲庵一詩云送人倦逢迎結庵就巖穴靜愛山頭雲空濛如積雪隨風亦卷舒觸石更明滅却憶古人詩祇可自怡悅

德朋一作明姓顧字澹堂咸淳志入徑山講論禪教四年因觀

竹溜以杵通節有聲豁然開悟號為竹筒和尚紹興年嘗

選入慈寧殿陞座講般若經法高宗奇之賜號及法衣夢梁

錄先是楊和王夢一異僧長身巨腹言欲化蘇州一莊翌

日師忽杖履徒步而至王見師奇偉與夢中見者無異茶

罷師首言大王莊田至多可施蘇州一莊以為徑山供佛

齋僧無窮之福王即以莊隸徑山師於緇素有因緣江

浙兩湖皆號之為布袋和尚再出舊縣志

餘杭縣志 卷二十九 方外一 釋 二十

僧傑號密庵福州鄭氏謁應庵于衢之明果一日庵問如何

是正法眼師遽對曰破砂盆庵領之出世衢之烏巨遷祥

符蔣山華藏詔住徑山晚年居天童後示寂塔于天童之

中峯舊縣志

寶印字坦叔嘉州李氏子幼通六經依密庵于中峯一日印

舉僧問巖頭起滅不停時如何密叱曰誰起滅師啓悟即

首肯後至徑山謁大慧慧掃室延之連主數刹往雪竇徑

山開堂說法孝宗召對選德殿稱旨賜肩輿于東華門內

紹熙元年十一月往見智策與之言別策問行日曰水到

渠成歸索紙書十二月初七夜雞鳴時九字如期而化續禪

燈錄葬于庵之西岡諡慈辯禪師塔曰智光舊縣志

善珍字藏叟泉州呂氏子朝命住四明之育王山臨安之徑

山逝于嘉定丁丑宋詩紀事

按瀛奎律髓載其山行晚歸詩云一徑入雲林晚晴扶杖吟照泥星復雨俯影月猶陰樹折憐巢覆泉清見葉沈愛閑自如此不是學灰心

道冲號癡絕武信長江苟氏子紹熙三年出峽參松源岳禪師

于饒州薦福會松源與首座曹溪生和尚出世妙果聽其入門法語有省遍歷叢林皆分半座嘉定十一年由徑山

首座出世嘉興天寧釋氏稽古略

崇岳生于龍泉之松源吳氏因以自號見大慧杲于徑山大

餘杭縣志卷二十九方外一釋

慧稱蔣山應庵華公為人徑捷師聞之不待旦而行既至

朝夕咨請應庵大喜以為法器隆興二年得度于臨安西

湖白蓮精舍遍游江浙諸老之門罕當其意慶元丁巳適

靈隱虛席被旨居之六年道盛行法席為一時冠退居東

庵微疾書偈而寂塔于北高峯之原陸游松源禪師塔銘

元肇字聖徒號淮海通州人淳祐中住靈隱寺後圓寂于徑

山瀛奎律髓有徑山詩徑山花又有徑山圖天然圖畫詩

菖蒲田詩宋詩紀事

師範號無準生蜀郡梓潼雍氏謁破庵先禪師于平江西華秀

峯頓悟元旨住明州清涼遷雪竇詔住育王遷徑山召入

對修政殿錫金襴僧衣宣詣慈明殿陞高座說法帝垂簾而聽賜號佛鑑禪師佛祖通載去寺四十里作室接雲水上親洒宸翰賜額曰萬年正續淳祐己酉示寂葬正續之側塔

曰圓照舊縣志

元

夢池號雲峯福之長溪人也依吳中雲夢澤公繼受具戒參癡絕無準皆器重之居蔣山席十有三載德祐改元寺被兵軍士有迫師求金者以刃擬師師延頸無怖畏軍士感動擲刀而去至元庚辰遷徑山寺戊子春有譖毀禪宗者師趨京集諸徒廷辨上嘉歎之賜食陞辭南歸書偈而逝

餘杭縣志

卷二十九

方外一

釋

三

壽七十五

徑山志

妙高長谿人見偃谿育王入室掌藏鑰一日谿舉譬如牛過窗櫺頭角四蹄都過了因甚尾巴過不得師劃然有省答曰鯨吞海水盡露出珊瑚枝谿云也只道得一半出世南興大蘆朝命居蔣山至元庚辰遷茲山寺權回祿草創纔什一師究心興建不十年悉還舊觀戊子江淮總統楊輦真伽率江南禪教諸山朝覲師遂趨京帝嘗問師曰修寺建塔有何功德師曰福蔭大千由是建仁王寺帝問禪以何爲宗師奏淨智妙圓體本空寂非見聞知覺所可知非思量分別所可解宣問再三師歷舉西天東土諸祖因緣

大抵禪是正法眼藏涅槃妙心超最上乘孰有過于禪詞  
旨明顯餘二千言帝大悅陞辭南歸山寺復災師謂衆曰  
吾宿負此山債耳遂竭力再營建殿閣他屋以次落成癸  
巳六月十七日書偈而逝舊縣志

希齡字西白依東叟穎于淨慈掌內記後至徑山分座說法  
元世祖召見賜號佛鑒成宗加號大圓仁宗又加號慧照  
至正壬戌四月手書付囑說偈而逝諡大辨塔曰寶華有  
瀑巖集及語錄行世徑山志

僧英字實存錢塘人唐詩人厲元之後也素有能詩名歷走  
閩海江淮燕汴一日登徑山聞鐘有省遂棄官爲浮屠結

餘杭縣志

卷二十九

方外一

釋

三

茅天目山中數年徧參諸方有道尊宿皆印可之故其詩  
有超然出世間趣別號白雲卽以名其詩集牟巖翁趙松  
雪胡長孺林石田趙青州皆爲序元詩選

行端臨海人何氏從族叔父茂上人得度於餘杭化城院參  
藏叟於徑山得其旨大德庚子出世湖之資福名聞京師  
特勅賜慧文正辯禪師住徑山師至是凡三被金襴之賜  
人以爲榮而師泊如也辛巳告終窆於寂照塔院年八十

八舊縣志

黃潛撰塔銘略曰菩提達磨以摩訶迦葉所得無上正法  
來止中土直接上根其後又分爲二心印獨付於曹谿派  
別爲五而宗風大振於臨濟至大慧而東南禪門之盛遂  
冠絕於一時故其子孫最爲蕃衍徑山元叟禪師大慧四



世孫也師諱行端元叟蓋其字族臨海何氏世爲儒家母王氏能通五經師生而秀拔幼不茹葷超然有厭薄塵紛之意六歲母教以論語孟子輒能成誦雅不欲汨沒於世儒章句之學十二從族叔父茂上人得度於餘杭之化城院十八受具戒一切文字不由師授自然能通而其器識淵邃夙負大志以斯道自任宴坐思惟至忘寢食初參藏叟和尙於徑山卽延入侍司是時衆滿萬指莫有契其機者叟旣告寂師至淨慈依石林鞏公卽處以記室尋以靈隱山水清勝往挂錫焉復謁覺庵真公於承天參雪巖欽公於仰山卽送師歸蒙堂居三歲而巖逝乃還浙右虎巖伏公時住徑山請師居第一座旣而退處楞伽室擬寒山子詩百餘篇皆真乘流注四方衲子多傳誦之大德庚子出世湖之資福伏公加盛禮覲師唱其道師微笑而不答辨香酬謝卒歸之藏叟焉學徒奔湊名聞京國後三年癸卯特旨賜慧文正辯禪師中書平章政事張閻公任行宣政使首舉師主中天竺皇慶壬子遷靈隱有旨設水陸大會於金山命師陞座說法峻事入覲於便殿從容奏對深契上衷加賜佛日普照之號陞辭南歸卽拂衣去養靜于良階之西庵至治壬戌徑山虛席三宗四衆咸謂非師莫能負荷其任相率白于宣政行院請師補其處奉定甲子

餘杭縣志

卷二十九

方外一

釋

雷

用使院闔詞奏請爲降重書作大護持師至是凡三被金襴袈裟之賜二十年間足不越閩而慕其道者鱗萃蟻聚至無所容歲饑皆裹糧而來以得見爲幸自大慧中興後代有名德得師而其道愈光暇日以餘力施於篇翰尤精絕古雅石田林先生隱居吳山不與世接獨遺師以詩曰能吟天寶句不廢嶺南禪其取重於前輩如此師生於宋寶祐乙卯佛涅槃後一日以至正辛巳八月四日終于徑山之丈室世壽八十八僧臘七十六其先五日示微疾問侍僧云呼之曾已休吸之尚未舍寄同諸苦源來者不來者如何是來者不來者侍僧無語師良久云後五日看越四日夜分沐浴更衣別衆趺坐書偈云本無生滅焉有去來冰河發燄鐵樹華開投筆垂一足而化龕留七日顏貌如生以是月十一日奉全身窆於寂照塔院而分爪髮建塔於化城幻有精舍四會說法語有錄行於世所度弟子若干人嗣其法而同時闡化於吳楚閩粵蜀漢間者若干人其上首靈隱法林本覺梵琦中天竺祖銘等狀師行業俾潛書之茲碑庸備著狀所述爲之序而銘諸庶幾不失其實來學得以究極夫旨趣云爾銘曰大雄唱滅宗途肇分不有單傳孰開我人巍巍大慧垂陰四葉門庭之盛規重矩壘法雷普震裂地轟天據獅子座四十二年被遇三

朝便蕃異數王臣順風有巖外護大法棟梁一夕而摧本無生滅焉有去來寂而常照碧潭秋月散爲千光非同非別徑山蒼蒼上與雲齊真身常住大慧焉依讚述虛空非愚則惑直書具文刻此山石

祖銘字古鼎姓應氏奉化人年十八從金峨寺橫山學出世法二十五得度受具戒出游諸方時元叟端禪師在靈隱寺往謁焉命居記室元統元年自徑山出住隆教寺遷寶陀寺至正五年住杭之中天竺七年乃還至徑山錫號慧性文敏宏學普濟禪師丞相達實特穆爾延至都之雲居庵暇則咨叩宗門元旨請禮彌篤一日有微疾語其徒曰觀音金臺至矣吾生平禪淨兼修之功有驗也乃書偈曰生死純真太虛純滿七十九年搖籃繩斷擲筆而逝危素塔銘

餘杭縣志

卷二十九

方外一

釋

三

有四會語錄暨外集若干卷古鼎洞徹元微踔厲縱橫袁伯長胡汲仲黃晉卿虞伯生歐陽元功皆稱慕之元功贈詩有上人能舉龍文鼎坐斷凌霄第一關之句初在中竺時有童子仇姓者從師荷包笠夜宿蘇之承天寺見空中有一寶鼎左右翼衛皆天神曰天帝以此鼎還賜徑山詰旦以事質其僧曰此必古鼎師還遷徑山也俄而徑山命下聞者異之元詩選

元熙字佛智號晦機至大間自江西百丈遷杭之淨慈延祐乙卯遷住徑山龔璫寄詩云十宵九夢遣分身世事翻騰可與陳天意何時能悔禍吾徒到處不如人雨聲歷歷侵

殘夜風物淒淒入小春縮地無方臂不羽倚樓東望獨傷神此詩蓋璠在浙西憲獄所作智有弟子曰梅屋常禪師華亭黃姓歷遊江浙叢林博究羣經爲智掌記服勤七年爲後來表率云

據龔璠悔齋稿參比邱覺岸常禪師傳

僧至仁字行中別號熙怡叟鄱陽人得法于徑山元叟端和尚駐錫蘇州萬壽寺博綜經傳貢尚書泰甫黃侍講晉卿皆服其說其詩曰澹居藁

元詩選下同

僧維則字天如吉之永新人族姓譚氏得法于普應國師中峯本公闢吳城城東北隅廢圃爲方丈曰師子林有竹萬竿外多怪石其中最高者類狻猊他石或跋或蹲厥狀匪

餘杭縣志

卷二十九

方外一

釋

三

一軒堂亭閣冠絕一時則公以中峯倡道天目師子巖故名師子識不忘也

按此傳見元詩選不言其嘗居徑山然據惟則師子林別錄有贈弟仁遠入京師并序云始余別家時仁遠從弟年纔十七今將四十矣以湖南教官滿考乘風爲上國游艤舟維揚迂道來徑山相尋梅雨中禪榻共燈數夕旣行贈偈云雨嶂烟巒翠欲流天開圖畫萬山頭凌霄閣上憑闌意留與他年說舊遊據此則惟則嘗住徑山矣又有元上人者亦徑山僧後住虎邱成廷珪竹軒集有詩

顏長老字悅堂徑山僧謝應芳龜巢稿寄徑山顏悅堂長老師詩題下註云時退居崑山州城之南扁其室曰城門小隱詩云每憶城南隱者家崑山石火徑山茶年年春晚重門閉怕聽階前落地花

明

慧朗字性原別號幻隱生于元世黃巖縣項宅母陳氏出家後詣徑山參元叟端公端云東嶺來西嶺師指草鞋云此是三文錢買得端云更道師云只恁麼道久之究盡底蘊洪武五年詔建佛會于鍾山召高行沙門師與季潭泐公與焉續西湖高僧事略下同

梵琦字楚石明州象山朱姓元貞二年生九歲從天寧訥公受業十六為僧因閱楞嚴至緣見因明暗成無見本明自發則諸暗相永不能昏于此有省然于向上一着尚有滯礙元叟端公主徑山往參謁問如何是言發非聲物前不

餘杭縣志

卷二十九

方外一

釋

三

物叟遽云如何是言發非聲物前不物速道速道師擬進語叟振威一喝已而應書寫大藏之選至京師崇天門聞綵樓上鼓聲豁然大悟歸參元叟叟笑迎曰且喜大事了畢

釋至仁撰行狀略曰師諱梵琦字楚石小字曇曜明州象山人姓朱氏父杲好善有隱德母張事佛惟謹以大元元貞二年丙申之歲六月丁巳夢日懷中而生師師在襁褓中有神僧來見之謂其父曰此兒佛也他日必當振佛法照曜濁世宗族鄉黨因以曇曜字之四歲失怙恃祖母王氏鞠之口授以論語輒能成誦或問書中所好者何語即應曰君子喻於義六歲善屬對七歲能書大字詩書過目不忘一邑以奇童稱之九歲抵西浙從海鹽天寧訥翁模公受經業又依從族祖晉翁洵公於湖之崇恩趙文敏公以先隴在崇恩數往來其間每見師異之為鬻僧牒禮訥翁得度年十六於杭之昭慶受具戒為大僧兩浙名山宿德爭欲招致座下徑山虛谷陵天童雲外岫淨慈晦機熙

更稱譽之年二十晉翁遷道場命為侍者元叟端和尚主  
徑山師住參英宗皇帝詔善書者赴闕金書大藏經師在  
選中辭叟遂行既至館於萬寶坊近崇天門一夕睡起聞  
絲樓上鼓鳴豁然大悟徹見徑山為人處述偈曰崇天門  
外鼓騰騰驀別虛空就地崩拾得紅爐一片雪却是黃河  
六月冰寶甲子正月十一日也是歲東歸再參元叟於徑  
山叟迎笑曰且喜汝大事了畢自是師資微訣佛祖機緣  
渙然矣叟遂以第二座延之而學者多咨扣焉未幾以行  
宣政院命出世海鹽州之福臻一香供元叟是為妙喜五  
世云天歷戊辰遷州之天寧至元乙亥遷杭之報國至正  
甲申遷嘉興郡之本覺丁亥帝師錫號曰佛日普照慧辯  
禪師丁酉遷郡之天寧己亥築寺西偏以居別自號西齋  
老人癸卯復主寺事戊申舉得法上首景璫自代而復老  
於西齋皇明啓運以洪武元年九月十一徵師說法於蔣  
山明年再徵又明年被召七月十二日至天界館於方丈  
候奏對而師以二十二日示寂二十六日索浴更衣跏趺  
書偈而逝天界住持白庵金禪師奉遺骸歸海鹽以八月  
二十八日葬於西齋而塔焉師六會語梓傳已久外有淨  
土詩慈氏上生偈北遊集鳳山集西齋集又有和天合三  
聖詩永明壽禪師山居師陶潛詩林逋詩總若干卷並行  
於世世壽七十五僧臘六十三景獻文晟請予錄其行實  
予始在徑山與師交甚契又同稟法於元叟和尚其後往  
來東西浙得師出處為詳不可辭也洪武庚戌九  
月初吉前住紹興府崇報禪寺法第至仁謹狀

按臨川危素撰塔銘語與行狀略同今不錄

餘杭縣志

卷二十九

方外一

釋

天

無愠字恕中臨海人族姓陳受度于元叟端公初居徑山兩  
坐浙東各刹投閒太白山中日本國王慕名奏請住持召

赴京師年幾七十上見憫特寢其奏賜歸天童故山

天童寺志

智及字以中吳縣顧氏子入海雲院為童子釋書與儒典並

進其師嘉之見訴公于建業尋歸海雲見秋葉吹墜于庭  
豁然有省至正辛卯秋請住持徑山補寂照故處風動四  
方向者愈眾洪武癸丑詔有道浮屠十人集京師大天界

寺師居其首以病不及召對乙卯賜還穹窿山山即海雲

所在也

宋濂塔銘

宗泐字季潭臨海人別號全室從天竺笑隱訢公學佛受具  
洪武四年住徑山應召住天界寺太祖每和其詩十年詔  
箋釋心經金剛楞伽三經製讚佛樂章奉使西域還授右  
街善世二十四年以老賜歸寂于江浦石佛寺有全室集

行世

徑山志

德祥字麟洲號止庵錢塘人洪武中住持徑山有桐嶼詩集

明詩綜

止庵詩源出東野意主崛奇而能斂才就格足與楚

石季潭巾餅塵拂鼎立桑門蒲庵以下要非其敵姚恭靖

餘杭縣志

卷二十九

方外一

釋

无

祥老草書歌云祥師只今為巨擘上與閑素爭巒岼錢塘  
山水甲天下秀氣毓子為靈檀十年不出筆成冢中山老  
兔愁難安晴軒小試烏玉玦雙龍隨手掀波瀾昨將一紙  
遠寄我天孫機錦千花攢願師勿置鐵門限從他需索來  
熱官搢紳相與歎莫及便欲奪去加巾冠然則止庵之草  
書更妙絕時人矣

靜志居詩話

普莊字敬中仙居人洪武中被召入天界寺歸住徑山示寂

於撫州

明詩綜

莊公自號呆庵作歌云呆庵呆道人  
不識世

間秋與春無榮無辱無疎親讚亦不喜罵不嗔雖以自訟  
其矜詡也多矣

靜志居詩話

有呆庵語錄行世

舊縣志

性冲號古湛俗姓張兒時每啼不止以供具列前卽輟既娶生子每歎曰塵勞膠固曷得出離因留心內典往參無趣

老人得教外別傳之旨後剃染入徑山終于車溪

嘉興縣志

按又有大本字宅衡徑山書記有詩見明詩綜

受汰字平觀寧邑吳氏子九歲出家安國迴泉深器之擔簦天台徧禮智者大師道場歸就西峯落成精舍蔚爲叢林

海內從事台教者翕然歸向壬辰冬示寂坐逝

舊府志

德珉字伯貞號石窗洪熙間虎邱寺僧後居徑山

明詩綜下同

法生字化儀崇德人少林寺僧後居徑山

圓信字雪庭更字雪嶠寧波人初住武康雙髻峯後居徑山

餘杭縣志 卷二十九 方外一

釋

三

有語風藁 明詩綜 雪公造詣淵微與天童悟禪師同爲禹門

法嗣天童以巾拂付弟子一十二人再傳登獅座者多至

六百七十八人居士不與焉雪公終身不付一弟子手攜

藤杖甚奇古或見之以爲難得雪公笑曰小大魔王動以

拄杖拂子付人十年之後此物不中打狗謂悟公暨通客

也將示寂坐高齋俛見擔糞者過其下呼至授以拂子曰

拏去趕蒼蠅可謂獨立不懼者已其居徑山書亭柱云孤

雲游此中萬山拜其下臨終偈云三門茅屋傍溪住兩扇

竹窗關月眠均瀟灑有致

靜志居詩話

僧清號死一廬陵人自幼穎悟異羣不茹葷酒厭塵俗遂出

家於寶禮正宗忠公受業焉宣德改元丙午得度於右街  
雲海師法潛侍香於大天界達會中卽左街講經制授宏  
慈普應禪師隨典藏事未幾陞首座開古蹟黑塔于都阜  
城門之西隣朝天宮之右旁也個磚片瓦皆自手焉正統  
癸亥賜額曰宏慶禪院卽黑塔也師初主水月次遷南通  
法至開山宏慶自此道風浩蕩朝野知名正統丙寅右街  
善世大功德兩庵宗師等薦師于大宗伯胡遂有雙徑之  
行覺山馮寧印施華嚴大經并函繡幡幢入殿供養一時  
金臺諸檀越沈福誠杜宏真等欣然發心鬻鐵鑄佛三軀  
鐘磬雲板香鑪花瓶儼若對越明年丁卯入院浙江都指

餘杭縣志

卷二十九

方外一

釋

三

揮使司張公敬師道行咸加獎助詳見翰林張序云徑山志下

僧林號鏡月杭州人住徑山少穎異穉齡出家弱冠剃染專  
心淨業間叩名碩俾參本來人久乃省作偈曰本來人本  
來人無腦無頭作麼尋驀然採着個鼻孔試勘元來是白  
丁正德乙卯歸寂塔凌霄東厓

圖澄字湛然會稽夏氏子嗣曹洞正宗三十二世得法於清  
涼大覺念禪師住會稽雲門顯聖寺周海門陶石簣並從  
之遊萬歷乙卯住徑山萬壽寺上堂有云昨夜泥牛耕破  
月波斯怒眼恨不徹石人撫掌笑呵呵木女傍徨淚成血



且道是何宗旨良久云我亦不識每開法衆常萬人得法弟子九人其最著者爲百丈雪竇壽方愚庵孟東山復嘗至京師與達觀月川諸老互爲酬唱所著有宗門或問慨古錄思益簡註楞嚴臆說法華意語涅槃疏金剛三昧及語錄若干卷行世凡五建大刹築石塘一百五十里利濟後人遊行不羈屢著神異遠近宗之天啓丙寅十二月四日圓寂塔全身于顯聖寺之陰云

慧才號西照雲南楊林嚴氏子生而質性凝重已婚耦一日讀金剛偈有感因白父母妻願割愛出世歷越適吳請益於天如佛慧徧聞諸經奧義末依徑山萬松得受記剝萬

松示寂益務韜晦嘉靖乙丑延主松江馬嶧專修淨業隆慶庚午十一月十三日告終世壽六十一

陸樹聲禪林餘藻

廣賓號心海於潛庠生也少忱真不容於邑人遂薙髮爲僧

歸蓮池宏大師得宗教合一之旨喜翰墨佳山勝水壘壘不倦嘗受邑令胡階慶邑人嚴調御等請住淨林寺著有

山居詩及輯天目徑山二志終以負性孤僻學徒憚遠年

六十餘示寂于錢塘之某庵嚴氏爲之建塔以葬焉

續縣志

真可字達觀吳江沈氏五歲不語有異僧過其門摩頂謂曰此兒出家當爲人天師言訖不見遂能言十七宿虎邱僧舍聞僧夜誦八十八佛名心大悅侵晨卽剃髮游五臺至

京師參徧融笑巖諸老發明大事歸吳復楞嚴廢寺于嘉禾創藏經于徑山精嚴戒律化後十二年葬於徑山茶毘

之日肉身儼然舍利無算

徑山志

憨山大師夢遊集徑山達觀可禪師塔銘略曰師諱真可字達觀晚號紫柏門人稱尊者重法故也其先句曲人父沈連世居吳江太湖之難缺師其季子也母夢異人授以附葉大鮮桃寤而香滿室遂有娠師生五歲不語有異僧過其門摩頂謂其父曰此兒出家當為人天師言訖忽不見師遂能語先時見巨人跡下於庭自是不復見髮年性雄猛慷慨激烈貌偉不羣弱不好弄生不喜見婦人浴不許先一日姊誤前就浴師大怒自後至親戚婦女無敢近者長志日益大父母不能拘嘗有詩曰屠狗雄心未易消蓋寶錄也年十七方杖劍遠遊塞上行至蘇州閶門遊市中天大雨值虎邱僧明覺相顧盼壯其貌因以傘蔽之遂同歸寺具晚餐驩甚聞僧夜誦八十八佛名心大快悅侵晨入覺室曰吾兩人有大寶何以汚在此中耶解腰纏十餘金授覺令設齋請剃髮遂禮覺為師年二十從講師受

餘杭縣志

卷二十九

方外一

釋

三

具戒之興嘉東塔寺見僧書華嚴經跪看良久嘆曰吾輩能此足矣遂之武塘景德寺掩關三年復回吳門辭覺行脚諸方歷參知識過匡山窮相宗奧義遊五臺至京師參徧融大老九年復歸虎邱省覺乃之淞江掩關百日之吳縣之天池時上御極之二三年大千潤公開堂於少林師結友巢林介如輩往參叩尋即南還至嘉禾師念大藏卷帙重多遐方僻陬有終不聞佛法名字者欲刻方冊易為流通遂與太宰陸五臺翁及司成馮公夢禎廷尉曾公同亭回卿瞿公汝稷等定議命道開董其事萬歷己丑創刻於五臺居四年以冰雪苦寒復移於徑山寂照庵工既行開公以病隱去續藏其役者弟子寒灰如奇奇子幻予本及最後弟子澹居鎧也初司成吳公用先為儀曹郎參師入室從容及刻藏事師據曰君與此法有大因緣師化後吳公出長浙藩用馮司成初議修復化城為徑山下院藏貯經板固吳公信力亦師預識云師於嘉禾刻藏有成議及返吳門復之都門乃訪予於東海萬歷丙戌秋七月也予以五臺因緣有聞於內遊名於東海那罷羅延窟慈聖皇太后印施大藏十五部首及東海予以謝恩入長安師攜開公走海上予在長安聞之亟促裝歸兼程至即墨師已出山在脚院一見大歡笑心相印契師返都門訪石經山

禮隋琬公塔西遊峨眉田三晉歷關中跨棧道至蜀禮普賢大士順流下瞿塘過荆襄登太和至匡廬尋歸宗故址江州孝廉邢懋學延居長松館師為說法江陰居士趙我聞謁請出家遂薙髮於山中師為名曰法鑑所謂最後弟子也師復北遊至潭柘與子同居西郊園中對談四十晝夜信為生平至快事居無何忽妖書發震動中外忌者乘間劾師師竟以是罹難金吾訊鞫時執政欲死師師聞之曰世法如此久住何為乃索浴說偈端坐安然而逝癸卯十二月十七日也世壽六十有一法臘四十有奇子弟子大義奉師龕至京口金沙曲阿諸弟子奉歸徑山供寂照庵師臨終有偈云怪來雙徑為雙樹貝葉如雲日自屯以是故耳時甲辰秋九月也越十一年乙卯弟子葬師全身於雙徑山後司成朱公國楨禮師塔知有水囑弟子法鑑啓之俗弟子繆希雍相得五峯內大慧塔後開山第二代之左曰文殊臺卜於丙辰十一月十九日茶毘廿三日歸靈骨塔於此師生平獨以荷負大法為懷每見古刹荒廢至必恢復始從楞嚴終至歸宗雲居等重興梵刹一十五所除刻大藏凡古名尊宿語錄若寂音尊者所著諸經論文集及蘇長公易解盡搜出刻行於世門人輯內外集若干卷乃為之銘曰佛未出世祖未西來擊塗毒鼓誰其人

餘杭縣志

卷二十九

方外一

釋

三

哉驚嶺拈花少室面壁只道快使翻成狼藉黃梅夜半老盧竊逃誰料嶺南有此獨獠南嶽青原擦牒涕漢多少癡人被伽誑賺五家手快如撫舜琴南薰倏至辨者知音兒孫惡辣觸者先亡但放一線其家永昌門戶孤單命在一絲有救之者定是嬌兒如漢張良為韓報仇縱然國破宗祧可求是生吾師如石迸筍出則凌霄孰知其本為法力戰通身汗血大似李陵空拳不怯身雖陷虜其心不亡千秋之下畢竟歸王師金明心盡化為骨逼塞虛空豈在山麓師不知我誰當知師一死一生春在花枝

法鑑字忍之號澹居江陰人姓趙氏生而穎慧長習舉子業

有志性命之學父母為聘妻竟不願父卒遂杖策孤游遇達觀禪師于皖江參求剃度師為薙髮受具戒時年三十有三既乃辭達師之天目之廬山入京師省達師于慈壽寺南旋住持浮山華嚴寺初達師刻藏經以雙徑寂照為

刻場達師歿于京師鐙欲滿師願遂往徑山見其地霧溼  
乃募修化城爲刻經版處達師靈龕自北歸卜地葬之  
鵬搏峯之陽退居徑山一日倚杖立堂下謂衆曰羚羊挂  
角不出十二衆罔測是晚脫去世壽六十有一僧臘二十  
有八德清夢遊集澹居鐙公塔銘鐙寂後有法本字幻予者繼刻經版  
然亦未竟

吳用先蜀中送澹居還徑山詩方外知交絕世情條然飛  
錫到蓉城來時寒照三巴雪去日春啼二月鶯巫峽迢迢  
疊巘翠洞庭眇眇片帆輕送君  
高臥徑山裏余亦歸尋鷗鷺盟

吳江沈瓚遊徑山訪鐙公詩二首漸遠招提境猶聞谷鳥  
啼雲深僧欲定花發客將迷野町清泉遶空林倦馬嘶何  
年悟禪理得意忘筌蹄祇園千畝廢野竹遍荒陂雀啄草  
花子風鳴桑樹枝日光含舍利山影界毘尼若問蓮花塔

餘杭縣志

卷二十九

方外一

釋

三

今當地湧時

歸安韓敬題徑山化城寺贈鐙公詩大地有情斯有險險  
卽累情情累眼刀峯沸海塞眼睂合眼逃之不能免澹師  
心憐方死生樓堞善巧化出城現前能因見成想立地陡  
將陂作平驚風故覺燕幕穩黑夜不怕羊腸行凡夫須識  
澹師意莫把風波攬平地願將  
大千恐怖心來往空山化城寺

國朝

性聰字憨璞閩人也俗連姓母章氏庭前夜坐見星入懷感  
孕後紅光蓋室師生焉年十有五歲出家天王寺越三歲  
乃祝髮至年二十有五慨然動參學之念由是出游詣支  
提山本輝法主習教數年乃知經論之學非究竟法也辭  
去始往南海普陀巖大雲和尚處圓具足戒入武林過夏

參紹興東山爾密和尚驀然有省抵温州參魚潭爲法通古淵和尚首座擬往金粟至杭州聞百癡和尚住黃岡太平寺特往見命掌書記會百和尚意退隱天台參林野和尚命職維那後百和尚住瓶窰長慶復往瞻依丁亥冬百和尚受金粟請留師住長慶戊子辭歸徑山住靜己丑春臨安邑侯劉公請住綿山觀音禪寺庚寅夏入金粟再爲首座辛卯餘杭都諫嚴公及諸縉紳請主法喜寺壬辰杭城禮部陳公請主廣福院未幾仍辭歸山丙申渡江住都城南海會禪寺戊戌春主延壽禪寺

上問南方尊宿師單名奏起復有大覺宏覺之封己亥春

餘杭縣志

卷二十九

方外一

釋

三

賜銀印敕書封明覺師號庚子七月疏請南旋辛丑入閩祭掃畢邵武邑侯紳矜等請住安國禪寺丙午年十二月十三日午時索筆書偈右脅而逝世壽五十有七僧臘三十有

九舍利塔瘞于樵川台山安國寺右

馮溥明覺聰禪師塔銘

海蓮字澈澄邑人俗姓王早歲父母先後歿遂立志出家順治間入稽留山依青谷孝禪師結茅棲息嚴誦法華維摩諸經廣集大乘經論區析義理多所通括既而辭青谷遠歷十方徧參耆宿凡十餘年復還稽留就青谷先所構茅菴益削石填土廓爲廣宇樓閣參差規模峻整所謂石雲菴是也復募置山田若干畝以資齋供遐邇信嚮甚衆性

耐勤苦甘澹泊滌山孫之泓嘗謂諸方尚文而師獨質諸方尚通而師獨隱緝巾蕭然意致自遠非虛語也蓮頗能詩其徒梅坡首山亦著聲叢林

參石雲志略

按同時有山幢者徑山僧石雲庵柱聯云幾回鑿出雞山石一似飛來鷲嶺雲是其所題東關茶院字是其所篆其僧必工詩善書惜無從考其顛末姑附識於此

正岳號豁堂一字茱庵錢塘人

唐棲志略餘杭人

少學儒業於沈無

回經史百家靡不通曉後薙髮靈鷲遍參知識得記剝於一默成禪師續臨濟三十三代宗席順治辛卯都人士請師主淨慈寺整法座之中衰機緣鼎盛百廢具舉尋以被逮江西洒然順受無所罣礙事白歸杭退居邑之靜林寺

餘杭縣志

卷二十九

方外一

釋

三

以避瞻禮之煩年七十餘偶示微疾而逝所著有谷鳴個庵集若干卷及書法丹青皆珍爲世寶

舊縣志

駐錫唐棲綠

野庵有同凡草行世

唐棲志略

行仁字公衡嘉禾陸氏子在孩提便厭葷血遂剃度于徑山之梅谷庵時雪嶠老人結茅東坡池上衡造廬參訪老人甚器重之後費隱禪師主萬壽方丈復參修數年印證嗣法年三十餘遊楚親炙黃梅巖頭嶽南諸勝便道過麻城訪邑友王潞時潞令麻城欲請主楚刹蹙然曰仁識此中風氣久矣人我相重毋徒擾知己爲也力辭之而歸退居臨安福勝寺有終焉之志生平于二乘之外尤精詩畫染

翰有高人風味體素羸弱年五十餘而逝舊縣志下同

墨浪華亭人爲牧雲禪師之嗣邑北鄉吉祥寺古名刹也里人王止庵特延請拄錫其地浪能詩能書兼能畫而究不落文字語言障勤修苦行自署號曰白牛年七十餘預知死期沐浴焚香無疾而逝

高斗魁吉祥寺贈僧墨浪詩誰道身心放下纔亂峯深處錫重回枯苗乍喜霑靈雨野筍何妨起蟄雷寫幅雲山規老健吟成詩句破喧逐瓦瓶想得如蓮大汲盡千巖花雨來

周簣宿放庵有懷墨公在徑山詩招提遠投宿夜半竹扉開僧自定中起客從何處來山廚初換火石榻早生苔遙憶祥峯老清吟日幾回

音緯號與然本姓孫名自修字無修江寧人登天啓甲子賢

餘杭縣志 卷二十九 方外一 釋 三

書丁丑授東粵鼉江知縣遷雲中同知解綬歸攜家隱谷里村乙酉年五十一遂薙染受具戒戊子參大雄玉林和尚金輪峯下留侍書狀甲午春遊雙徑住同安頂又移住懸谿定水庵及冬病劇與邑友孫之泓訣曰吾必俟師至吾始行時方以山中闊隔無從通問爲難抵夜而玉林果扁舟至矣遂起與訣撒手長往江以南知識如天童恣公雲門禮公皆參常議自見大雄曰是吾師也遂執侍不去臨歿待之永訣其爲邑令時自號攀玉蓋亦有前因云所著有與然堂詩文稿呆庵詩稿

高斗魁禹航秋泛圖贈僧與然詩二首剩水殘山何處尋喜從筆墨見蕭森禹航千載風流事不沒頭陀死後心

十載睽違見面難北高峯下語巘  
一瓢聞寄茗溪水留得孤舟紙上看

性悅號別庵四川人大慧第十七傳杖錫來浙住普陀後寺  
復兼主錢塘之接待寺康熙三十七年戊寅兼住徑山大  
宏大慧之道宗風所播遠邇緇流雲集龍象聿新時值  
翠華連歲南巡性悅道行上徹

宸聰屢賜

召見請以江寧前明土內琉璃瓦施蓋普陀大殿

特旨俞允江浙兩省提鎮運送至山性悅渡海董率而令弟子  
玉峯秉拂徑山當法席久弊之後一旦繼大慧而中興禪

門稱盛事焉

縣志  
備補

餘杭縣志 卷二十九 方外一 釋

三

世鑑字白峯松江華亭人褚氏子徑山松源房僧也詩畫有  
稱于時康熙年遊京師挂錫大樹菴四十四年

聖駕南巡蒙

召見

天語溫霽

敕賜香雲禪寺額叢林傳以為榮康熙四十八年年五十有九

卒 參邵應龍徑  
山八詠詩注

周松白峯和尚寓餘杭西園詩朝來聽雨過蓬閣心地能  
令幻想除已分懶殘同撥芋不妨坡老為燒豬南湖千頃  
龕燈對大滌孤峯壁月虛記得  
石泉槐火句好憑昔夢證如如

宏禮號具德會稽張氏子從漢月藏苦參十七年授以衣拂



在天寧學侶奔轅順治初靈隱寺燬卓錫鼎建康熙丁未  
從徑山至天寧一日顧謂法嗣原志曰我十九日到上方  
法須用汝代說至期曉起更衣呼曰隨我上方去頓足一  
下遂示寂

西湖志

寂進徑山僧自號進道者能詩書學米海嶽黃湖鎮李鈺家  
藏王周畫十幀每幀各題五律一首是其遺筆今大中丞  
阮公輯兩浙輶軒錄採其詩入補遺卷中

按指長老徑山古梅庵僧孫琮有古梅庵按指長老書招度  
歲詩歲暮苦酬應老至尙難免何如深山中蕭散獲自遣  
悵望不能得孤懷日輾轉徑山按指翁庵居當絕巘春秋  
餘杭縣志

卷二十九

方外一

釋

早

已八十煙霞興不淺巖信怪經年柴扉到來鮮臘殘忽我  
憶遠招擘魚繭上言雪將銷下言梅可晒

山曉閣集

海懷徑山僧寺有萬菊軒昔有僧嘗於軒前栽菊萬本故名  
海懷題詩云幽禪雅與傲霜宜佳種分栽丈室遲秋月入  
叢花灼灼曉風迎露影離離脩然獨對增吟興采矣盈懷  
寄遠思高士豈能忘靖節招尋應待過溪時

宗泰字古笠平湖德藏寺僧受法於費隱老和尚時喜濡墨  
作顛草或作小畫後復住徑山高庵自稱高庵道人柯魯  
山謂其詩凡三變而益進有閱世堂稿

樵李詩繫

按兩浙輶軒錄載宗泰所作苓山夜話詩云春日思雙  
徑茗溪取道還十年勞夢寐兩度到苓山庭柏依然古

茗花似舊班閒雲忙  
出岫何處有人間

際信字道源秀水沈氏子九歲失怙隨母茹齋有兄先在杭  
州月塘寺出家至十三歲母病危篤亦命出家無何母故  
營殯事畢至十七歲至杭遇兄於月塘兄命禮太虛薙髮  
往古崇福受具後參學天長理安金山侍鑑老人於天目  
執記室乾隆癸丑秋住餘杭龍泉寺至乙卯春付門人永  
徹主之退住杭城東園孝慈庵

王昶撰道源上人六十壽序

按際信龍泉退院時有詩云自覺衰遲不及前名藍一  
住已三年豈因茶熟纔思客屢為厨空也乞錢花雨有  
時飛講座青山終古對寒泉飄飄杖笠隨緣去法  
社支撐賴爾賢又龍泉僧淨律有關居詩三十首

道文號如宗句餘何氏子幼業儒年二十六求出家至天台

餘杭縣志

卷二十九

方外一

釋

里

清涼見鏡公受具足戒數年鏡深契之授以衣鉢如姑蘇  
募鑄千佛銅鐘施者雲集長洲彭尺木居士雅重之歸住  
四明國寧寺移住安樂寺寺久荒落未幾檀施踵至伐材  
庀工遂鼎新焉示寂之日取筆書偈端坐而逝

董作棟  
撰塔銘

餘杭縣志卷二十九終

